

Ministère de l'Agriculture, de la Viticulture et du Développement rural, 8
Référence: 480/2022
- 2 AOUT 2022
A traiter par:
Copie à:

Här Fernand Etgen
Président vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 1. August 2022

Här President,
esou wéi d'Chambersreglement et virgesäit, biede mir lech, dës parlamentaresch Fro un den Här Landwirtschaftsminister weiderzeleeden.

Säit véier Joer huet Lëtzebuerg een neit Déiereschutzgesetz. Laut dësem Gesetz gëllen Déieren net méi als Géigestänn, mee als Liewewiesen, déi ënner dem Schutz vum Staat stinn. Véier Joer no Akraafttriede vun dësem Gesetz huet sech d'Situatioun vun den Déieren zu Lëtzebuerg awer net grondsätzlech verbessert. D'Déiereschutzorganisatiounen bekloen een akute Plazmangel an de véier Déierenasyler vum Land. Honnerte vu Kazen an Hënn hu keen Ënnerdaach a verbreed sech rasant weider, well se net steriliséiert oder kastréiert sinn.

Besonnenesch während dem Lockdown 2020 hu sech vill Leit Hausdéieren ugeschafft, déi se nom Lockdown ausgesat oder un d'Déierenasyler ginn hunn. D'Situatioun gëtt duerch d'Vakanzesaison nach verschlëmmert. Dobäi kënn, datt ëmmer méi Déieren am Internet oder op de soziale Medie verkaf ginn, wat vum Gesetz hier verbueden ass. Aus all deene Grënn sinn d'Déiereschutzorganisatiounen un d'Grenze vun hire Kapazitéite gestouss.

An deem Kontext hu mir folgend Froen un den Här Minister:

- 1) Ass den Här Minister bereet, zousätzlech finanziell oder materiell Mëttele bereetzstellen, fir et den Déiereschutzorganisatiounen ze erlaben, hir wäertvoll Aarbecht och weiderhi kënnen ze maachen an doduerch d'Déiereschutzgesetz vun 2018 ëmzesetzen?
- 2) D'Gesetz vun 2018 verbitt den Onlinehandel mat Déieren. Wat mécht d'Regierung, fir sécherzestellen, datt dat Gesetz och agehale gëtt?
- 3) Wéi steet den Här Minister zur Proposition vun den Déiereschutzorganisatiounen, een dréngend benéidegt Déierenasyl, oder op d'mannst eng Opfaangstatioun fir Déieren, am Norde vum Land ze finanzéieren?
- 4) Gi vum Ministère Sensibilisierungscampagnen initiéiert, fir d'Déierebesëtzer op hir Flichten opmierksam ze maachen?
- 5) Gëtt un engem nationale Plang geschafft, fir d'Ëmsetzung vum Déiereschutzgesetz méi effikass duerchzesetzen?

Mat déiwem Respekt,


Fernand Kartheiser
Deputéierten


Jeff Engelen
Deputéierten



Äntwert vum Minister fir Landwirtschaft, Wäibau a ländlech Entwécklung op d'parlamentaresch Fro n° 6593 vun den éierbaren Deputéierten Fernand Kartheiser a Jeff Engelen

- 1. Ass den Här Minister bereet, zousätzlech finanziell oder materiell Mëttele bereetstellen, fir et den Déiereschutzorganisatiounen ze erlaben, hir wäertvoll Aarbecht och weiderhi kënnen ze maachen an doduerch d'Déiereschutzgesetz vun 2018 ëmzesetzen?**

Den Art. 6 (3) vum Déiereschutzgesetz vum 27. Juni 2018 erméiglecht et den Déiereschutzorganisatiounen, een Agrément fir hier Aktivitéiten unzefroen. An deem Kader kënnen si dann och eng Demande op finanziell Ënnerstëtzung stellen, sou dat si vum Landwirtschaftsministère duerch Subventiounen gehollef kréien.

- 2. D'Gesetz vun 2018 verbitt den Onlinehandel mat Déieren. Wat mécht d'Regierung, fir sécherzestellen, datt dat Gesetz och agehale gëtt?**

D'Déiereschutzgesetz verbitt de Verkaf vun Honn a Katzen a Geschäfte, op Marchéen an op der Voie publique. Den Internet gehéiert zu kenger vun dese Kategorien, sou datt den Onlinehandel net explizitt verbueden ass. Et ass awer wichteg, d'Leit ëmmer erëm drop opmierksam ze maachen, dass de Wee, sech iwwer den Onlinehandel en Déier unzeschaffen, mat enger ganzer Rei Risike verbonnen ass.

- 3. Wéi steet den Här Minister zur Proposition vun den Déiereschutzorganisatiounen, een dréngend benéidegt Déierenasyl, oder op d'mannst eng Opfaangstatioun fir Déieren, am Norde vum Land ze finanzéieren?**

De Landwirtschaftsministère ass bereet, Demandë fir een neien Asyl hei am Land ze ënnerstëtzen, sou wéi dat och an der Vergaangenheet ëmmer de Fall war. All Projet an deem Sënn, deen déi virgeschriwwen Konditiounen erfëllt, gëtt op Demande, wéi bei deene well existéierenden Asyler och, finanziell ënnerstëtzt.

- 4. Gi vum Ministère Sensibilisierungscampagnen initiéiert, fir d'Déierebesëtzer op hir Flichten opmierksam ze maachen?**

Sensibilisierungscampagne si sécherlech ee Moyer, fir d'Öffentlechkeet nach méi op dee Sujet opmierksam ze maachen. De Ministère erënnert drun, dass hie beim Aféiere vum neien Déiereschutzgesetz eng Sensibilisierungscampagne via déi verschidde Medie gemaach hat, mee et ass sécher ubruecht fir hei en Rappel ze maachen.

5. Gëtt un engem nationale Plang geschafft, fir d'Ëmsetzung vum Déiereschutzgesetz méi effikass duerchzesetzen?

D'Déiereschutzgesetz vum 27. Juni 2018 gesäit eng ganz Partie Moosnamen a Restriktiounen vir, déi et virun dem Gesetz net gouf, mat dem Ziel, d'Déierewuel hei am Land ze verbesseren. D'Aufgab vum Ministère ass et engersäits d'Gesetzgebung un déi nei wëssenschaftlech Erkenntnisser unzepassen, an dat am Aklang mat der europäescher Gesetzgebung. Anersäits soll de Ministère sech drëm këmmere, dass déi Gesetzgebung respektéiert gëtt, wat duerch d'Kontrolle vun den zoustännege Verwaltungen geschitt. Et handelt sech hei em Routinekontrollen, déi vum europäesche Kontrollrèglement a vun der Cross Compliance am Kader vun der europäescher Agrarpolitik virgesi sinn, an awer och em Kontrollen, déi op Hand vu Plainten gemeet ginn.

Lëtzebuerg, den 30. August 2022

De Minister fir Landwirtschaft, Wäibau a ländlech Entwécklung,

(s.) Claude HAAGEN